

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-266/13
Sarajevo, 28.02.2013. godine

Z A P I S N I K

13. VANREDNE SJEDNICE DOMA NARODA PARLAMENTA FEDERACIJE BOSNE I HERCEGOVINE, održane 28. februara 2013. godine

Sjednica je počela u 11.52.

Sjednici je predsjedavao Radoje Vidović, predsjedavajući Doma naroda Parlamenta Federacije BiH.

Na početku sjednice predsjedavajući je pozdravio delegate, predstavnike Vlade Federacije, predstavnike akreditiranih medijskih kuća koji prate rad sjednice i goste.

Izostanak sa sjednice su opravdali: Senahid Šaković, Slađan Ilić, Predrag Kojović, Mira Jurić, Zoran Jovanović, Drago Puzigaća, Zahid Bašić, Elvira Abdić-Jelenović, Ivo Divković i Esed Radeljaš.

Na osnovu evidencije Stručne službe, predsjedavajući je konstatovao da sjednici prisustvuje 40 delegata, što čini većinu, te Dom naroda može raditi i punovažno odlučivati.

Prije prelaska na rad predsjedavajući je stavio na glasanje Zapisnik 12. vanredne sjednice Doma naroda Parlamenta Federacije BiH, održane 15. februara 2013. godine.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, bez primjedbi, sa 36 glasova za i uz tri uzdržana glasa, usvojio Zapisnik 12. vanredne sjednice Doma naroda Parlamenta Federacije BiH, održane 15. februara 2013. godine.

Predsjedavajući je podsjetio delegate da je 12 delegata iz reda bošnjačkog naroda zatražilo sazivanje vanredne sjednice Doma naroda na kojoj bi se razmatrao Prijedlog Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima.

Budući da je Klub zastupnika SDA u Predstavničkom domu Parlamenta Federacije dostavio Prijedlog Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima sa prijedlogom da se razmatra po hitnom postupku, sazvana je ova sjednica u skladu sa Poslovníkom o radu Doma naroda.

Kako je Predstavnički dom na 13. vanrednoj sjednici od 26. februara 2013. godine skinuo sa dnevnog reda tačku - Prijedlog Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima, koji je predložio Klub zastupnika SDA, a donio Odluku o načinu reguliranja statusa prava na penziju pripadnika oružanih snaga Bosne i Hercegovine kojima su prestala prava na dan, 31. maj 2012. godine - Kolegij Doma naroda je predložio da se Prijedlog Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima skine sa dnevnog reda ove

sjednice, a da se kao 1. tačka razmatra - Prijedlog Odluke o načinu reguliranja statusa prava na penziju pripadnika oružanih snaga Bosne i Hercegovine kojima su prestala prava na dan, 31. maj 2012. godine.

U raspravi o predloženom dnevnom redu učestvovali su: Amir Zukić koji je izjavio da se razmatra Prijedlog Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima, kako je to tražilo 12 članova Kluba delegata bošnjačkog naroda, a ne predložena odluka, jer se, prema njegovim riječima, ovom odlukom ne rješavaju statusna pitanja ove kategorije branitelja. Sretko Radišić je izjavio da se jedinstvenim zakonom trebaju riješiti statusna pitanja branitelja, ali da bi Dom naroda trebao donijeti odluku kao što je to učinio i Predstavnički dom. Jasenko Tufekčić je izjavio da je sjednica zakazana na zahtjev 12 članova Kluba delegata bošnjačkog naroda na kojoj bi se razmatrao Prijedlog Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima, a ne odluka. Istakao je da bi se sjednica trebala odgoditi ako se nisu stekli uvjeti za razmatranje ovog zakona.

Predsjedavajući Doma naroda je izjavio da je u pozivu za ovu sjednicu predložen dnevni red sa ovom tačkom dnevnog reda a u međuvremenu je Predstavnički dom skinuo sa dnevnog reda ovaj prijedlog Zakona. Stoga se predlaže promjena dnevnog reda. Izjavio je da se sjednica nije mogla otkazati jer nije bilo pisanog obrazloženja od Kluba delegata bošnjačkog naroda.

Zijat Mušić je podsjetio delegate da je Dom naroda na 12. sjednici od 22. novembra 2012. godine donio Zaključak kojim je skinut sa dnevnog reda Prijedlog Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima koji je predložila Vlada Federacije, a da će se u parlamentarnu proceduru uputiti sveobuhvatni zakon koji će regulirati i statusna pitanja pripadnika oružanih snaga Bosne i Hercegovine. Zatražio je pojašnjenje koji su uvjeti MMF u vezi sa ovim prijedlogom Zakona. Predložio je da se razmatra Prijedlog Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima koji je predložila Vlada Federacije, a da se sveobuhvatni zakon mora što prije donijeti.

Predsjedavajući Doma naroda je obavijestio delegate da su kolegiji oba doma Parlamenta Federacije održali sastanak sa predstavnicima MMF, koji su izjavili da bi ova kategorija branitelja trebala biti uvrštena u jedinstveni zakon, a da bi donošenje Prijedloga Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima prekinulo aranžman sa MMF.

Aner Žuljević je postavio pitanje - da li Federacija BiH može finansirati prava predviđena budžetom Federacije bez aranžmana sa MMF, te upitao da li su u izradi jedinstvenog zakona uključena boračka udruženja.

Federalni ministar finansija Ante Krajina je obavijestio delegate da postoji jedan aranžman sa MMF da se oni slažu da se status ove kategorije boraca riješi Zakonom, a važno je udovoljiti stavovima MMF i održati stand –by aranžman.

Jasenko Tufekčić je postavio pitanje - šta će biti sa isplatom penzija nakon 20. aprila 2013. godine i koja je pravna snaga Odluke.

Zijat Mušić je upitao šta će se desiti nakon 31. marta 2013. godine, ako se ne donese Zakon.

Ante Krajina je odgovorio da bez učešća MMF Federacija neće ostati bez prihoda, ali da bi se se morale napraviti određene uštede kako bi se izvršile obaveze utvrđene budžetom Federacije.

Salko Selman je upitao šta će se desiti nakon 15. marta 2013. godine, ako se ne donese jedinstveni zakon. Ante Krajina je izjavio da je na sjednici Vlade

Federacije dogovoreno da se jedinstveni zakon uputi u parlamentarnu proceduru i donese do 15. marta 2013. Godine.

Delegatima se obratio predstavnik boračke populacije Šemsudin Pojata, koji je izjavio da je stajalište boračke populacije da se donese odluka koju je donio Predstavnički dom, ali da se moraju poštivati rokovi za donošenje jedinstvenog zakona.

Zijat Mušić je pozvao sve delegate da imajući u vidu stav boračke populacije, podrže donošenje Odluke.

Jasenko Tufekčić je izjavio da neće glasati za Odluku jer smatra da se njom dovode u zabludu ljudi na koje se ona odnosi i da je potrebno donijeti kvalitetan zakon koji će riješiti njihov status.

Ekrem Prošić je izjavio da je za donošenje ove odluke, ali da se ne okrivljuje Dom naroda ako se ne ispoštuje rok za donošenje jedinstvenog zakona jer su se predstavnici boračke populacije sa predstavnicima Vlade Federacije dogovorali u vezi sa sadržajem ove odluke.

Nakon toga je Amir Zukić zatražio pauzu.

Nakon pauze, izjavio je da će Klub delegata bošnjačkog naroda podržati donošenje Odluke, ali da je potrebno donijeti jedinstveni zakon u čiju izradu će biti uključeni predstavnici svih boračkih kategorija.

Dževad Rađo je podržao donošenje Odluke, ali da se donese zakon do 20. aprila 2013. godine.

Zijat Mušić je izjavio da postoji zakon koji je Vlada dostavila u parlamentarnu proceduru u osmom mjesecu prošle godine i da bi se o njemu moglo raspravljati, ako jedinstveni zakon ne bude dostavljen u proceduru.

Nakon rasprave o dnevnom redu predsjedavajući je stavio na glasanje prijedlog Kolegija Doma naroda da kao 1. tačka dnevnog reda ove sjednice uvrsti - Prijedlog Odluke o načinu reguliranja statusa prava na penziju pripadnika oružanih snaga Bosne i Hercegovine kojima su prestala prava na dan, 31. maj 2012. godine.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 37 glasova za, uz dva uzdržana glasa i uz jedan glas protiv, usvojio Prijedlog Kolegija Doma naroda. Obavijestio je delegate da za tačku - Izbor i imenovanja - ne postoji materijal jer je Kolegij Doma naroda očekivao Prijedlog Odluke o potvrđivanju odluke predsjednika Federacije BiH o imenovanju sudija Ustavnog suda Federacije BiH. Kako Odluka predsjednika Federacije nije dostavljena ova tačka je skinuta sa dnevnog reda.

Nakon toga, predsjedavajući je konstatovao da je Dom naroda Parlamenta Federacije BiH, sa 35 glasova za, uz jedan uzdržani glas i uz jedan glas protiv, usvojio sljedeći:

D N E V N I R E D

Prijedlog Odluke o načinu reguliranja statusa prava na penziju pripadnika oružanih snaga Bosne i Hercegovine kojima su prestala prava na dan, 31. maj 2012. godine.

Predstavnički dom je na 14. vanrednoj sjednici od 26. februara 2013. godine donio Odluku o načinu reguliranja statusa prava na penziju pripadnika oružanih snaga Bosne i Hercegovine kojima su prestala prava na dan, 31. maj 2012. godine.

U raspravi su učestvovali: Ivo Tadić koji je izjavio da se u izradu jedinstvenog zakona moraju uključiti predstavnici udruženja bivšeg HVO-a; Jasenko Tufekčić koji je izjavio da se Odlukom reguliraju pitanja regulirana Zakonom o službi u Oružanim snagama Bosne i Hercegovine i da kao takva nema pravno uporište; Josip Perić je izjavio da bi se trebala održati tematska sjednica o stanju u braniteljskoj populaciji i istakao da u jedinstveni zakon trebaju ući samo stvarni branitelji; Mira Ljubijankić je, u ime Kluba delegata srpskog naroda izjavila da Klub podržava donošenje ove odluke i donošenje jedinstvenog zakona i Zijat Mušić koji je predložio da Dom naroda donese Zaključak o zakazivanju vanredne sjednice na kojoj će se razmatrati Prijedlog zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima.

Nakon rasprave, prešlo se na glasanje o Odluci.

Predsjedavajući je, na osnovu rezultata glasanja, konstatovao da je Dom naroda Parlamenta Federacije BiH, sa 40 glasova za, uz jedan glas protiv i uz jedan uzdržani glas donio Odluku o načinu reguliranja statusa prava na penziju pripadnika oružanih snaga Bosne i Hercegovine kojima su prestala prava na dan, 31. maj 2012. godine.

Predsjedavajući je, na osnovu rezultata glasanja, konstatovao da je Dom naroda Parlamenta Federacije BiH, sa 40 glasova za i uz jedan uzdržani glas, usvojio sljedeći:

Z A K L J U Č A K

Dom naroda Parlamenta Federacije BiH obvezuje Vladu Federacije BiH da prilikom izrade jedinstvenog zakona o ostvarivanju prava na penziju pripadnika oružanih snaga Bosne i Hercegovine u Federaciji BiH uključi sva krovna udruženja pripadnika Armije Bosne i Hercegovine, Hrvatskog vijeća odbrane, Ministarstva unutrašnjih poslova i pripadnike Oružanih snaga Bosne i Hercegovine kojima su prestala prava na dan 31. maj 2012. godine.

Potom je predsjedavajući stavio na glasanje Zaključak koji je predložio Zijat Mušić, a odnosi se na zakazivanje vanredne sjednice Doma naroda Parlamenta Federacije za 19. april 2013. godine na kojoj bi se razmatrao Prijedlog Zakona o dopunama Zakona o potvrđivanju prava na prijevremenu starosnu penziju ostvarenu pod povoljnijim uvjetima koji je predložila Vlada Federacije BiH.

Predsjedavajući je, na osnovu rezultata glasanja, konstatovao da Dom naroda Parlamenta Federacije BiH nije usvojio ovaj zaključak jer je za glasalo 19 delegata, 15 delegata je bilo uzdržano, a dva delegata su bila protiv.

Sjednica je završena u 14.25.

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVALAJUĆI

Radoje Vidović